

Jangan lemah dalam pertelingkahan - Asri

KUALA LUMPUR 13 Sept. - Jangan sesekali berasa lemah dengan pertelingkahan dan salah faham yang sering dibangkitkan dalam kalangan beberapa pihak mengenai pelbagai perkara dan isu di negara ini.

Felo Penyelidik Majlis Profesor Negara (MPN), Dr. Muhammad Asri Mohd. Ali berkata, beliau yakin semua kaum dan bangsa Malaysia masih memiliki rasa sayang terhadap negara ini dan ia dibuktikan melalui konsensus dan persefahaman dicapai melalui perbincangan, sekiranya terdapat isu-isu yang berbangkit.

"Persoalannya adalah di manakah hala tuju bangsa Malaysia pada masa depan dan ia menjadi tanggungjawab kepada kerajaan untuk memastikan rakyat hidup dalam keadaan sejahtera, harmoni, seterusnya kekayaan dan ekuiti diagihkan secara adil.

"Dalam hal ini, kita banyak belajar dengan penjajah British yang

meletakkan sasaran lima tahun dalam pembangunan negara bermula sebelum merdeka hingga hari ini, buktinya Dasar Ekonomi Baru, seterusnya Rancangan Malaysia Ke-11," katanya.

Sementara itu, beliau yang juga Pensyarah Kanan Fakulti Ekonomi Universiti Malaya (UM) berkata, kerajaan juga perlu memastikan aliran pelaburan yang masuk ke negara ini perlu diagihkan sama-rata supaya dapat dinikmati seluruh masyarakat.

Katanya, terbaharu merupakan pelaburan Landasan Kereta Api Pantai Timur (ECRL) berjumlah RM55 bilion yang disifatkan sebagai satu angka yang cukup besar dan ia memang dialu-alukan semua pihak.

"Sekiranya pelaburan ini hanya dibolot oleh pihak luar, maka sekali lagi rasa tidak puas hati dalam kalangan masyarakat berbilang kaum di negara ini akan timbul seterusnya menjadi isu politik dan konflik perkauman pada masa akan datang," katanya.



MUHAMMAD ASRI